

發願莫不從 善惡俱待對 倚伏理難窮
賢士奉法言 道亦在誠忠 解是大智慧
上為太極翁 寶蓋連玉珮 命駕御九龍
金華擎洞經 捧香悉仙童 嘯訝徹玄都
鳴玉扣瓊鐘

竦身凌太清 超境逸雲霄 保扶持法言
遊玄極道遙 萬劫猶昨夜 千春如展朝
巍峩陰雲華 手攀寶林條 香煙自然生
玄階莫扶搖 靈幡應時散 繁想應時消
滅智弘大混 無為福清謠

學仙絕華念 念念相因積 去來亂我神
神躁靡不歷 滅念停虛閣 蕭蕭入空寂
請經若饑渴 持志如金石 保子飛玄路
五靈度符籍

靈寶領教濟度金書卷之一百四十三

靈寶領教濟度金書卷之一百四十四

洞微高士開光救苦真人審金具校
靈寶道玄弘教水南先生林靈真誌
科儀立成品祈禱通用
宿啓儀

宿啓儀

步虛 燒香頌

各禮師存念如法

宣衛靈呪

東方

九炁青天明星大神 煥照東鄉 洞映九門
轉燭陽光 掃穢除氛 開明童子 號曰玄卿
備衛我軒 上對帝君 收魔東坎 討捕凶群
奉承正道 赤書玉文 九天符命 攝龍驛傳
普天安鎮 我得飛仙 和與道合真

南方

三炁丹天 煥景流光 熒星轉燭 洞照太陽
上有赤精 合契虛皇 開明童子 號曰華芳
總禦火兵 備守玉堂 斬邪束妖 剪截魔王
北帝所承 風火衝當 流鈴交煥 翊衛道場
正炁流行 敢有倡狂 我享上功 坐運魁罡

德劫長存 保天無疆 和與道合真

西方

七炁素天 太白流精 光耀金門 洞朗太冥
中有素皇 號曰帝靈 保神安鎮 衛我身形
斷絕邪源 王道正明 宮殿整肅 三景齊并
道合自然 飛升紫庭 靈寶符命 普惠萬生
元皇正炁 來合我身 功加一切 天地咸寧

北方

五炁玄天 元始徘徊 辰星轉燭 洞煥太微
黑靈尊神 號曰層威 統冠飛天 仙裙羽衣
備守五門 檢精捕非 敢有干試 謬落斬摧
玉符所告 神真八威 邪門閉塞 正道明輝
三光映照 我身無衰 策空駕得 舉形仙飛
和與道合真

中央

黃炁中天 調理乾坤 陶鑄陰陽 總統玄真
鎮星吐輝 流煥九星 開光童子 號曰天璘
陽炁燄上 朱煥炎精 洞照內外 運我身形
百邪摧落 攝役鬼靈 中山神呪 普天使聞
五靈安鎮 身飛上清 和與道合真

法鼓二十四通

無上三天玄元始三炁太上道君召出臣身
中三五功曹左右官使者侍香金童傳言玉
女五帝直符直日香官各三十二人出出者
嚴裝關啓玄壇天帝神君宮召此間土地里
域真官正神急上關啓臣今奉為入齊意以
今宿啓告齋願得

玉清道炁靈寶妙光下降流入臣等身中即
使玄壇清淨內外成真天無氣穢地絕妖塵
琳琅振響十方肅清萬魔不干真誠上徹今
臣所啓速達逕御

太上無極大道至真玉皇上帝御前

請稱法位

具位奉行共齋法事小兆_臣共與臨壇官衆
等今故燒香願以是功德上為七世父母
天子王侯土地官長_臣等經師籍師度師及
山林巖樓學真道士同學門人齋主九祖父
母存亡兩代內外親族天下人民飛行蠢動
一切衆生皈身皈神皈命
無上十方靈寶自然至真大道特乞原赦前

生今世宿罪重過得免離三惡五道十苦八
難九厄之中身得道真飛行虛空白日升天
侍衛道君通達無上金闕七寶自然宮殿永
與道合所啓玄感上御
至真無極道前

禮十方

禮足各長跪皈命虔誠懺悔

臣法衆等志心皈身皈神皈命

十方無極大道太上靈寶天尊懺悔修齋弟
子及臣法衆等普天率土一切衆生自從浩
劫以來至于今日或身業所犯四肢舉措動
違戒律不依經典或心業所犯志念不專情
浮意動馳騁不息或口業所犯善惡反論綺
語飾非華詞惑衆三業大罪無量無邊因今
懺悔並乞蕩除富願臣等身入至仙會道合
真神合真寂洞入自然性命合道玄會無為
臣等志心稽首禮謝
無上至真三寶

樂法以為妻 愛經如珠玉 持戒制六情

三啓頌

樂法以為妻 愛經如珠玉 持戒制六情

念道違所欲 淡泊正氣停 蕭然神靜默
天魔並敬護 世世受大福

又

鬱鬱家園盛 濟濟經道興 天人同其願
縹緲入大乘 因心立福田 靡靡法輪昇

七祖生天堂 我身白日騰

又

大道洞玄虛 有念無不契 鍊質入仙真
遂成金剛體 超度三界難 地獄五苦解
悉歸太上經 靜念稽首禮

三禮

臣等志心稽首禮

太上無極大道

臣等志心稽首禮

三十六部尊經

臣等志心稽首禮

玄中大法師

重稱法位

具位_臣共謹重誠上啓

太上無極大道元始天尊太上道君太上老

君高上玉皇十方已得道大聖眾至真諸君
丈人大帝天帝三十六部尊經玄中大法師
三界官屬一切真靈臣等草莽微生塵埃濁
質玄風披拂佩龍章鳳篆之奇化雨涵濡膺
瑤檢金圖之秘慶緣師授寵渥天開孟宣暢
於皇靈庸緝熙於帝載蛟負深淵臨之志鵬
搏期海運之程接物利生夙炳丹青之誓憲
天弘道宜敷赤素之忱庶證玄功上酬洪貺
既奉詞首敢不上聞

宣詞

按如詞言備殫真切臣等洗心練志潔己登
齋按三洞之威儀法天象地敷十華之盟信
呼陰召陽翠煙騰百和之芳華燈耀千枝之
景靈風振響梵唱琳琅企紫闕以馳神邈清
都而注想自未月某日為始崇建某齋轉經
行道燒香散花密祈民欲之上通恪奠天光
之下濟仁同一視諒葑菲之不逮恩浹千生
監靈葵而有造惠露誕敷於甘澤慈雲垂蔭
於蕃釐萬化裁成三靈鼓舞謹依秘法宿以
啓聞恩惟太上三尊十方眾聖曲加監映俯

鑒控陳勅勒靈寶仙真土地主執同心協力
掃內外之氛葩會道運元契天人之影響妖
魔滅試景福來翔今臣等五炁宣平三關靜
嘿凝真合景操存而丹室虛明綴武依光奏
對而彤輝御達齊功成就厚澤周流合家國
以承恩溥玄黃而錫慶明晨行道續更啓聞
臣誠惶誠恐稽首頓首再拜以
聞

十二願

- 一願乾坤明素
 - 二願氣象清玄
 - 三願聖人萬壽
 - 四願化洽八埏
 - 五願天垂甘露
 - 六願地發祥煙
 - 七願四時應候
 - 八願萬物生全
 - 九願家多孝悌
 - 十願國富才賢
 - 十一願齋功廣被
 - 十二願善瑞日臻
- 存神復爐

香官使者左右龍虎君侍香諸靈官當今臣
建齋之所自然生金液丹碧芝英百靈眾真
交會在此香火爐前今臣學道得道求仙得
仙齋主受福幽顯沾恩十方仙童玉女侍衛

蘭煙傳臣向來所啓速速逕御
太上無極大道至真玉皇上帝御前
出堂頌

靈寶領教濟度金書卷之一百四十四